

四庫全書薈要

• 乾隆御覽本

史部

十六國春秋卷三十二

前燕錄十

李產

續

李產字子喬范陽人也少剛毅有志格永嘉之亂豫州刺史同郡祖逖素好從橫擁部衆於南土力能自固產往依之會逖卒其弟約領逖之衆無綏御之才不為士卒所附產見約志趨異常謂所親曰吾以北方鼎沸故

遠來就此冀全宗族今觀約所為有不可測之志吾託名姻親當早自為計無事復陷身於不義也爾曹不可以目前之利而忘久長之策乃率子弟十數人間行還鄉里仕於石氏為本郡太守及雋南征前鋒達郡界鄉人皆勸產降產曰夫受人之祿當同受安危今若捨此即以圖存義士將謂我何城潰始詣軍門請降雋嘲之曰卿受石氏寵任衣錦本鄉何故不能立功於時而反委質乎烈士處身固如是邪產泣曰誠知天命有歸非

微臣所抗犬馬為主豈忘自効但以孤窮勢蹙致力無術僂俛歸死實非誠款僞嘉其慷慨顧謂左右曰此真長者乃擢用之歷位尚書性剛正好直言每至進見未嘗不論朝政之得失同輩咸敬憚之僞亦重其儒雅前後固辭年老不堪理劇轉太子太傅謂子績曰以吾之才而致於此始者之願亦已過矣不可復以西夕之年取笑於來今也固辭而歸死於家

產子績字伯陽少以風節知名清辯有辭理弱冠為郡

功曹時石虎親征段遼師次范陽百姓饑餒軍供有闕
虎大怒太守惶怖避匿績曰郡帶北裔與寇接壤疆場
之間人懷危慮聞輿駕親戎將除殘賊雖嬰兒白首咸
思效命非唯為國亦自求寧即使身膏草野猶甘為之
敢有私吝而闕軍實但比年災饉家有菜色因敝力屈
無所取濟逋廢之罪情在可矜虎見績年少有壯節嘉
而恕之太守獲免幽州刺史王午辟為主簿及雋之南
征績隨午奔魯口鄧恒謂午曰績鄉里在北父已降燕

今雖在此終不為用方為人患午曰績於喪亂之中捐家立義情節之重雖古烈士無以過也乃以猜嫌害之竊恐燕趙之士聞之謂我直相聚為盜耳了無意識衆情一散不可復集坐自屠潰也恒乃止午猶恐諸將不與已同心或致非意乃資遣之績始辭午往見雋雋讓之曰卿不識天命棄朕邀名今日乃始來邪績曰臣聞豫讓報智伯仇稱於前史既官身所在何事非君陛下方弘唐虞之化臣實未為歸順之晚也雋曰此亦事主

之一節耳拜太子中庶子尋遷司徒長史與僞談論東
宮辭甚切直暉時侍側甚不平之及即位太宰恪欲以
績為尚書右僕射暉追憾績往言不許恪屢請之暉乃
謂恪曰萬機之事委之叔父伯陽一人暉請獨裁遂出
為章武太守以憂死

黃泓

黃泓字始長廬江人也

晉書作魏郡斥邱人

父沉善天文秘術泓

從父受業精妙踰深兼博覽經史尤明禮易性甚忠勤

非禮不動永嘉之亂與渤海高瞻避地於薊

一作幽州

說瞻

曰王浚昏虐終必無成宜思去就以圖久安慕容廆法
政修明虛懷引納且讖言真人出東北倘或是乎宜相
與歸之同建事業瞻不從泓乃率宗族歸廆廆待以客
禮引為參軍軍國之務動輒咨之泓止說成敗事皆如
言廆常曰黃參軍國之仲翔也及皝嗣位遷左常侍領
史官甚見親重石虎率衆來攻皝將走遼東泓曰賊有
敗氣可無憂也不過二日必當奔潰宜嚴勒士馬為追

擊之備。鮒曰：「今寇盛如此，卿言必走，孤未敢信。」泓曰：「殿下言盛者人事耳，臣言必走者天時也。胡走無疑？及期果退，鮒益奇之。儁即王位，遷從事中郎。冉閔之亂，儁欲謀取中原，訪之於泓。泓勸儁行，儁從之。及僭偽號，署為進謀將軍、太史令、關內侯，尋加奉車都尉、西海太守。領太史令、開陽亭侯，進封平舒縣五等伯。常從左右，諮決大事。靈臺令許敦害其寵，諂事上，庸王評設異議以毀之。乃以泓為太史、靈臺諸署統，加給事中。泓待敦彌厚。

不以毀已易心，諱敗以老歸家。歎曰：「燕必中興，其在吳矣。」一作吳人恨吾年過不及見耳。年九十七卒。後三年，吳王垂果以興焉。

賈堅

賈堅字世固，渤海人也。少尚氣節，彎弓三石餘，仕趙殷中督。趙亡，乃棄冉閔，還鄉里，擁部曲數千家以自固。上庸王評、狗渤海遣使招之，堅終不降。評與戰，擒之，僞愛其才，赦而勿殺。時年六十餘。太原王恪聞其善射，故親

試之乃取一牛置百步上召堅使射曰能中之乎堅曰
少壯之時能令不中今老矣正可中之恪大笑乃射發
一矢拂脊再一矢磨腹皆附膚落毛上下如一恪曰能
復中乎堅曰所貴者以不中為奇中之何難一發中之
觀者咸服其妙儁署為樂陵太守治涪城尋遷太山太
守屯山荏晉將荀美引兵擊之堅所將纔七百餘人美
兵十倍於堅堅將出戰諸將皆曰衆少不敵不如固守
堅曰固守亦不能免不如戰也遂出戰身先士卒殺美

兵十餘人復還入城。美兵圍之，堅歎曰：「吾自結髮立功，名而每值窮阨，豈非天乎？與其屈辱而生，不若守節而死。」乃謂諸將曰：「今危困至此，計無所設。卿等可去，吾將止死。」將士皆泣曰：「府君不出，衆亦俱死耳。」乃扶堅上馬。堅曰：「我如欲逃，必不相遣。今當為卿曹決鬪，若勢不能支，卿等可趣去，勿復顧我也。」乃開門直出。美兵四集，堅立馬橋上，左右射之，皆應弦而倒。美兵衆多，從塹下斫橋，橋斷，人馬俱陷，生擒之。遂失山。荏美謂堅曰：「君父祖

世為晉臣奈何背本不降堅曰晉自棄中華非吾叛也

民既無主強則附之

一作強則托命

既已事人安可改節吾東

脩自立涉趙歷燕未嘗易志君何忽忽相謂降乎羨復責之堅罵曰豎子兒女御乃公羨怒執置雨中數日不食憤憾而卒子活復為任城太守

慕輿根

慕輿根榼廬城大人也善騎射嘗從斃行獵有一野羊立於懸崖之上斃命左右射之無有中者根乃自募射

一發而中銳甚奇之署帳下折衝將軍屢進奇略儁嗣
位轉廣威將軍敗鄧恒於魯口斬蘇林於中山所在立
功歷殿中領軍將軍儁立受遺輔暉進位太師副贊朝
政根性本強自恃先朝勲舊舉動倨傲心不服恪潛欲
為亂乃言於恪曰今主上幼冲母后干政殿下宜慮楊
駿諸葛元遜之變思有以自全且定天下者殿下之功
也兄亡弟及古今成法俟畢山陵可廢主上為王殿下
自踐尊位以建大燕無窮之福恪曰公醉邪何言之悖

也吾與公受先帝遺詔云何而遽有此議昔曹臧吳札
竝於家難之際猶曰為君非吾節況今儲君嗣統四海
無虞宰輔受遺奈何更有私議公忘先帝之言邪根大
愧懼辭謝而退恪以告吳王垂垂勸恪殺之恪曰今新
遭大喪二鄰伺隙山陵未建宰輔自相誅夷恐乖遠近
之望且可忍之秘書監皇甫真言於恪曰根本庸豎過
蒙先帝厚恩強叅顧命而小人無識自國哀已來驕狼
日甚將成禍亂明公今日居周公之地當為社稷深謀

早為之所恪亦不聽根遂與武衛將軍慕輿干潛謀誅恪及評因而篡立入白太后及暉曰太宰太傅將謀不軌臣請帥禁兵誅之以安社稷太后將從之暉曰二公國之戚穆先帝選之託以孤嫠必不肯爾安知非太師欲為亂也乃止根又思戀東土言於太后及暉曰今天下蕭條外寇非一國大憂深不如東還暉亦不納於是反形漸露恪聞之遂與太傅評密奏根罪狀根乃伏誅并其妻子皆梟首東市

李洪

李洪平陽人也初帥流民入定陵未幾衆至數千壁於舞陽受王浚假署為雍州刺史後歸旣仕為大理歷內史右司馬石虎攻棘城洪弟普以為棘城必敗勸洪出避禍洪曰天道幽遠人事難知且當委任勿輕動以取悔普固請不已洪曰卿意見明審者當自行之吾受慕容氏大恩義無去就當效死於此耳與普流涕而訣普遂降於虎從虎南歸死於喪亂洪由是以忠篤著名從

雋攻鄧恒於魯口出屯高冢慕輿根擊恒部將鹿勃早
洪徐整騎隊助之俘斬甚衆暉立轉龍驤將軍略地河
南拔許昌汝南陳郡徙萬餘戶而還進位司空王猛克
鄴隨暉入長安拜駙馬都尉奉朝請卒

悅綰

悅綰檣盧城大人也初仕鮑為司馬石虎入寇遣征北
張舉襲凡城鮑以綰為禦難將軍授兵一千以守之及
趙兵至將吏皆恐欲棄城走綰曰受命禦寇生死以之

且憑城堅守一可敵百敢妄言惑衆者斬衆然後定綰
身先士卒親冒矢石舉等竭力攻之經旬不克乃退虎
死鄴中擾亂冉閔殄滅石氏石祗遣使求援僞遣綰將
兵三萬會之鄴平引還遷前將軍追擊呂護於魯口有
功進尚書右僕射尋署安西將軍領護匈奴中郎將并
州刺史戍并州曄嗣位轉尚書左僕射綰見王公貴戚
多為蔭戶言於曄曰今三方鼎峙各有吞併之心而太
傅政尚寬和百姓多有隱附傳曰惟有德者可以寬臨

其次莫如猛今諸軍營戶三分共貫風教頽弊威綱不立至使民戶殫盡委輸無入吏斷常俸戰士絕廩官貨粟帛以自贍給既不可聞於鄰國且非所以為治宜一切罷斷諸蔭戶盡還郡縣肅明法紀以清四海曄納之使綰專治其事糾擿姦伏無敢隱匿出戶二十餘萬朝野怨怒太傅評大不平之綰先有疾乃自力彊校戶籍疾遂益亟而卒後符堅滅燕聞綰之忠恨不得見乃拜其子為郎中

皇甫真

皇甫真字楚季安定朝那

一作
郡字

人也其兄安晉東夷校

尉崔寔請為長史卑辭說諭終莫能致寔招之寔與真
即時俱至並以文章才儁任居樞要真更以弱冠高才
擢拜遼東國侍郎黜嗣立遷平州別駕時內艱連年百
姓勞悴真議欲寬減賦稅休息力役不合旨免官後以
破麻秋功拜奉車都尉守遼東營丘二郡皆有善政及
儁即位入為典書令從輔國將軍恪等討擒冉閔即南

圖拔鄴石氏舊都城內珍玩寶貨充溢真一無所取惟
存恤人物收斂圖籍而已儻臨終真與恪等俱受顧命
慕輿根將謀為亂真陰察知之請恪除根恪未忍顯其
事俄而謀洩伏誅恪乃謝真曰不從君言幾成禍敗呂
護之叛恪謀於朝曰遠人不服修文德以來之今護宜
以恩詔降不宜以兵戈取也真曰護九年之間三背主
上揆其奸心凶悖未已明公方飲馬江湘勒銘劍閣況
護葢爾近畿而不梟戮宜以兵算取之不可復以文檄

喻也恪從之真乃上疏輒以家奴婢五十口馬七十匹

牛四十頭以供軍資拜冠軍將軍別部都護

一作都督

師還

拜鎮西將軍并州刺史鎮護匈奴中郎將徵拜侍中光

祿大夫遷司空領中書監累遷太尉侍中符堅密謀并

燕欲覘其可否命西戎主簿郭辦潛結匈奴左賢王曹

穀遣使詣鄴朝貢辦因為之副真兄腆及從子奮覆皆

仕於秦辦既至鄴歷造公卿謂真曰僕本秦人家為秦

所誅故寄命曹王貴兄常侍及奮覆兄弟竝相知有素

真怒曰臣無境外之交此言何以及吾君似姦人得無
因緣假託乎白晳請窮治之太傅評不許辦還為堅言
燕朝政無綱紀實可圖也鑒機識變惟皇甫真耳堅曰
以六州之衆豈得不使有智士一人哉真亦秦人而燕
用之固知關西多君子矣真性清儉寡慾不營產業飲
酒至石餘不亂雅好屬文凡著詩賦四十餘篇王猛入
鄴真望馬首拜之明日更見語乃卿猛猛曰昨拜今卿
何恭慢之相違也真曰卿昨為賊朝是國士吾拜賊而

卿國士何所怪也猛大嘉之謂權翼曰皇甫真故大器也從堅入關為奉車都尉奉朝請數歲而卒

梁琛

梁琛廣平人也初為呂護叅軍護敗遂仕慕容氏為中書著作郎轉給事黃門侍郎暉時琛以大鴻臚奉使於秦侍輦苟純副之琛至長安苻堅方畋於萬年欲引見琛琛曰秦使至燕燕之君臣朝服備禮灑掃宮庭然後敢見今秦王欲野見之使臣不敢聞命秦尚書郎辛勁

謂琛曰賓客入境惟主人所以處之君焉得專制其禮
且天子稱乘輿所至曰行在所居何常之有又春秋亦
有遇見之禮何為不可乎琛曰晉室不綱靈祚歸德二
方承運俱受明命而桓溫猖狂窺我王略燕微秦孤勢
不獨立是以秦王同恤時患要結好援東朝君臣引領
西望媿其不競以為隣憂西使之辱敬待有加今強寇
既退交聘方始謂宜崇禮篤義以固二國之歡若忽慢
使臣是卑燕也豈修好之義乎夫天子以四海為家故

行曰乘輿止曰行在今海縣分裂天光分曜安得以乘輿行在為言哉禮不期而見曰遇蓋因事權行其禮簡略豈平居容與之所為哉客使單行誠勢屈於主人然苟不以禮亦不敢從也

一云琛曰天子以四海為家故可云然今靈命既分天光派別

勢均義等理絕茲談況唇亡齒寒豈輔車之義乎故桓溫寇境而貴朝同恤敵邑愧賴以為君憂秦人使燕未嘗飾乾不食爵盈不飲而敬恭待命享禮有加今虜寇已獲繼尋舊好會遇之禮豈其時乎選賓小使誠勢屈於主然勞不以禮不敢聞命 堅嘉琛有奉命之才乃為之改行宮百

僚陪位然後延之如燕朝之儀事畢堅與之私宴問東

方名臣為誰琛曰太傅上庸王評明德茂

一作懿

親光輔

王室車騎大將軍吳王垂雄略冠世秀邁絕倫內贊百

揆外禦四國

此二句一作折衝禦侮

其餘諸臣或以文進或以武

用官皆稱職野無遺賢雖周文多士漢武得人未有過

也琛從兄奕先在秦為尚書郎會罷堅使典客館於奕

舍琛語有司曰昔諸葛兄弟各處三國及瑾為吳聘蜀

與諸葛亮惟公朝相見退無私面君子之志往賢盛事

余竊慕之今使之即安私室所不敢也竟不館奕堅乃

卷三十二
敕奕數來就邸舍與琛卧起間問東國起居琛曰今二
國鼎據兄弟竝蒙榮寵琛之在燕亦猶兄之在秦論其
本心各有所在琛欲言東國之美恐非西國之所欲聞
欲言其惡復非臣子所得論也兄何用問為堅聞而嘉
之使太子延琛相見秦人欲使琛拜太子先諷之曰隣
國之君猶其君也隣國之儲君亦何以異乎琛曰天子
之子視元士欲其由賤登貴以塞盈心在國不臣其父
之臣況鄰國之臣乎且苟無純敬則禮有往來情豈忘

恭但恐降屈為煩耳秦人不能對乃不果拜王猛勸堅
留琛堅不許留秦月餘厚禮遣歸琛每應對不先告純
純甚恨之及歸純言於暉曰琛在長安與王猛甚親善
疑有異謀琛又數稱秦王堅及王猛之美且言秦將興
師宜為之備已而秦果伐燕皆如琛言暉乃疑琛知其
情會評為秦所敗遂收琛繫獄符堅入鄴釋之除中書
著作郎引見謂之曰卿昔言上庸王吳王皆將相奇才
何為不能謀畫自取亡國琛曰天命廢興豈二人所能

移也堅曰卿不能見幾而作虛稱燕美忠不自防反為身禍可謂智乎琛曰臣聞幾者動之微吉凶之先見者也如臣愚暗實所不及然為臣莫如忠為子莫如孝自非有一至之心者莫能保忠孝之始終是以古之烈士臨危不改見死不避以徇君親彼知幾者心達安危身擇去就不顧家國臣就使知之尚不忍為況非所及乎堅稱善久之王猛表為主簿領記室督

公孫鳳

公孫鳳字子鸞上谷人也隱居昌黎之九城山谷各衣
單布寢處土床夏每并食於一器久之蛆臭然後乃食
彈琴吟咏陶然自得人咸異之莫能測也暉以安車徵
之至鄴見暉不言不拜衣食舉動如在九城賓客造請
少得與言數年病卒

公孫永

公孫永字子陽襄平人也少而好學恬淡虛靜隱於平
郭南山不娶妻妾非身所墾植則不衣食之吟咏巖谷

欣然自得年餘九十操尚不虧與公孫鳳俱被暉徵至
鄴見暉不拜王公已下造之皆不與言雖經隆冬盛暑
端然自若一歲餘詐狂暉送之平郭後苻堅又將備禮
徵之難其耆年路遠乃遣使者致問未至而永卒堅深
悼之謚曰崇虛先生

王歡

王歡

一作觀
又作勸

字君厚樂陵人也安貧樂道專精耽學不

事產業常丐食誦詩雖家無斗儲意怡如也其妻患之

或焚毀其書而求改嫁歡笑而謂之曰卿不聞朱買臣妻邪時人聞者莫不嗤笑歡守志彌篤遂為通儒暉襲偽位署為國子博士親就受經尋遷祭酒暉為苻堅所滅歡遂歸隱堅復徵為祭酒後以太子少傅卒

悉羅騰

悉羅騰字叔龍范陽涿鹿人也工圍碁究盡其妙獨步當時莫與為儔俄而北平樂抄少雋出與齊名騰仕暉為尚書郎桓溫來伐為吳王垂叅軍從事與溫戰生擒

叛人段思擊斬李述勇冠三軍及暉為秦所滅隨徙長
安拜三署郎秦末年與暉潛謀殺堅堅名騰考問具服
遂見殺

安屈

安屈遼東胡人也其先祖曰世高漢時以安息王侍子
入洛歷魏至晉避地遼東因以家焉屈仕暉為殿中郎
將

劉洛

劉洛中山浦陰縣人也縣差充征弟興私代復背軍逃歸縣以本名捕斬興詣郡自列稱逃是興身請代洛死洛又固陳已實正名宜從憲辟兄弟爭命詳刑有疑有司具以聞暉曰洛應征輒留興冒名逃役俱應極法但兄弟競死義情可嘉宜特原之

十六國春秋卷三十二

五經通考
卷之四
經義
五

欽定四庫全書薈要

史部

十六國春秋卷三十

三至
六

詳校官員外郎臣楊世綸



十六國春秋卷三十三

前秦錄一

苻洪

東晉
苻洪

字廣世略陽臨渭氏人也其先蓋有扈氏之苗裔

子孫強盛世居武都為西戎酋長始其家池中生蒲長
五丈五節狀如竹時咸異之謂之蒲家因以氏焉父懷
歸為部落小帥母姜氏因寢產洪驚覺而寤先是隴右

大雨霖百姓苦之謠曰雨若不止洪水必起故因名之
曰洪年十二而父卒代為部帥好施多權略驍武善騎
射屬劉氏之亂乃散千金招延俊傑訪安危變通之術
戎晉襁負奔之宗人蒲光蒲突遂共推為盟主劉曜僭
號長安遣使拜平遠將軍不受自稱護氏校尉秦州刺
史略陽公光等逼洪歸曜曜以洪為寧西將軍率義侯
及曜敗於洛陽洪率部人西保隴山進為氏主石虎將
兵攻上邽洪詣虎降虎大悅親出迎之拜冠軍將軍委

以西方之事監六夷諸軍事涇陽伯趙建平四年石生起兵關中洪遂西結張駿自稱晉北平將軍雍州刺史虎既滅生洪率戶三萬下隴東如馮翊說虎徙關中儔傑及羌戎以實東方曰諸氏皆洪家部曲洪帥以從誰敢違者虎從之拜洪護氏校尉徙秦雍及氏羌十餘萬戶於關東遷龍驤將軍流民都督處於枋頭從征段遼有功遷光烈將軍進爵為侯尋拜使持節都督六夷諸軍事冠軍大將軍進封西平郡公其部下賜爵關內侯

者二千餘人以洪為關內領侯冉閔言於虎曰蒲洪雄
果得將士死力其諸子皆有非常之才且握強兵五萬
屯據近畿宜密除之以安社稷虎曰吾方倚其父子以
取吳蜀柰何殺之待之愈厚佛圖澄亦言於虎曰觀蒲
氏有王氣請急除之虎陰欲殺洪洪稱疾不朝梁犢之
亂虎遣洪以車騎將軍從燕王石斌討之遂平梁犢進
為侍中車騎大將軍開府儀同三司都督雍秦州諸軍
事雍州刺史改封本國略陽郡公會虎卒石遵即位閔

又言於遵曰蒲洪人傑也今以洪鎮關中臣恐秦雍之地非復國家之有此雖先帝臨終之命然陛下踐祚自宜改圖遵從之罷洪都督餘並如前洪怨之乃歸枋頭遣使降晉後石鑒殺遵所在兵起秦雍流民相率西歸路由枋頭共推洪為主衆至十餘萬洪子健在鄴斬關出奔枋頭鑒懼洪之逼也欲以計遣之乃以洪為都督關中諸軍事征西大將軍雍州牧領秦州刺史洪會官屬議應受與否主簿程朴請且與趙連和如列國分境

而治洪怒曰吾不堪為天子耶而云列國乎引朴斬之
永和六年朝廷規復中原以洪為氐王使持節征北大
將軍都督河北諸軍事冀州刺史廣川郡公健為假節
右將軍監河北征討前鋒諸軍事襄國公時姚弋仲亦
有圖據關中之志恐洪先之遣子襄帥衆五萬伐洪洪
迎擊破之斬獲三萬餘級於是安定梁楞等並率關西
民望說洪曰今胡運將終中原喪亂明公神武必成大
業繼蹤周漢宜稱尊號以副四海之望洪亦以識文有

草付應王又孫堅之生背有草付字遂改姓苻氏自稱
大都督大將軍大單于三秦王以南安雷弱兒為輔國
將軍安定梁楞為前將軍領左長史馮翊魚遵為後將
軍領右長史京兆段陵為左將軍領左司馬王墮為右
將軍領右司馬天水趙俱隴西牛夷北地辛牢皆為從
事中郎氏首毛貴為單于輔相洪謂博士胡文曰孤率
衆十萬居形勝之地冉閔慕容儁可指辰而殄姚襄父
子克之在吾數中孤取天下有易於漢祖初石虎以麻

秋鎮枹罕冉閔之亂秋率衆歸鄴洪使子龍驤將軍雄
逆擊獲之以為軍師將軍秋因說洪曰冉閔石祗方相
持中原之亂未可平也不如先取關中基業已固然後
東征天下誰敢敵之洪深然之既而秋因宴鵠洪欲并
其衆世子健收秋斬之洪臨死謂健曰吾所以未入關
者以為中原可指時而定今不幸為豎子所困中州非
汝兄弟所能辦關中周漢舊都形勝之國進可以一同
天下退不失保全秦雍吾死之後便可鼓行而西言終

而卒年六十六健僭偽位追謚曰惠武皇帝廟號太祖

十六國春秋卷三十三

十六國春秋卷三十四

前秦錄二

苻健

苻健字建業洪第三子也初母羌氏夢感大熊而孕生之夜洪又夢族曹氏指健謂之曰是兒與家門可以吾名字之於是名熊字世建後避石虎外祖張熊之名故改焉及長雄果便弓馬好施與善事人甚為石虎父子

所親愛歷位翼軍校尉鎮軍將軍虎雖外禮符氏心實
忌之乃陰殺其諸兄而不害健也永和六年洪死健嗣
位代統其衆乃去大都督大將軍三秦王之號稱晉官
爵遣叔父安告喪於京師且請朝命秋八月京兆杜洪
竊據長安自稱晉征北將軍雍州刺史以馮翊張琚為
司馬戎夏雄雋多歸附之健密圖關中懼洪知之乃偽
受石祗官爵以趙俱為河內太守戍溫牛夷為綏集將
軍戍懷密繕宮室於枋頭課所部種麥示無西意有知

而不種者健殺之以徇既而自稱晉征西大將軍開府
都督關中諸軍事雍州刺史以武威賈玄頤為左長史
略陽梁安為右長史段純為左司馬辛牢為右司馬京
兆王魚安定程肱胡文等為軍諮祭酒悉衆而西以魚
遵為前鋒行至盟津起浮橋以濟遣弟輔國將軍雄帥
步騎五千人入自潼關兄子揚武將軍菁帥衆七千人
自軹關入河東臨別執菁手曰若事不捷汝死河北我
死河南不及黃泉無相見也濟訖焚橋自統大衆隨雄

而進杜洪聞之與健書侮嫚之以司馬張琚弟光

一作先字

為征虜將軍帥眾萬三千逆戰於潼關之北光兵大敗走還長安健雖戰勝猶修箋於洪并送名馬珍寶請至長安上尊號洪曰幣重言甘誘我也乃悉召關中之眾來拒健聞而筮之遇泰之臨健曰小往大來吉亨昔往東而小今還西而大吉孰大焉諸君知否此則漢祖屠秦之機也是時眾星夾河西流占者以為百姓西遷之象健遂率軍進次赤水據其城以抗洪洪弟郁勸洪迎

健洪不從郁率所部來降健遣雄略地渭北氐酋毛受
叱高陵徐磋屯好畤羌酋白犢屯黃白衆各數萬皆斬
洪使遣子來降苻菁魚遵所過城邑無不降附洪懼固
守長安九月菁與張光戰於渭北之陰槃擒之三輔郡
縣堡壁悉降冬十月健長驅至長安杜洪張琚奔司竹
十一月甲午入都長安以民心思晉乃遣叅軍杜山伯
詣建康獻捷并修好於大司馬桓溫於是秦雍夷夏皆
來歸附趙梁州刺史石寧獨據上邽不下十二月雄進

兵擊斬之

皇始元年春正月健軍師將軍左長史賈玄碩等請依
劉備稱漢中王故事表健為侍中大都督關中諸軍事
大將軍大單于秦王健怒曰吾豈堪為秦王耶且晉使
未返我官位輕重非汝曹所知也既而密使梁安諷玄
碩等上尊號健偽讓再三然後許之丙辰僭即天皇位
於南郊

紀事本末作
天王大單于

國號大秦大赦境內改元皇始繕

宗廟社稷置百官於長安追尊父洪為武惠皇帝廟號

太祖尊母姜氏為皇太后立妻強氏為天皇后子長為
太子靚為平原公生為淮南公靚為長樂公方為高陽
公碩為北平公騰為淮陽公柳為晉公桐為汝南公庾
為魏公武為燕公幼為趙公以雄為都督中外諸軍事
丞相領車騎大將軍雍州牧東海公菁為衛大將軍平
昌公宿衛二宮雷弱兒為太尉毛貴為司空略陽姜伯
周伯周健之舅也為尚書令梁楞為左僕射王墮為右僕射魚
遵為太子太師強平平王后之弟也為太傅段純為太保略陽

呂婆樓為散騎常侍趙并州刺史張平遣使來降健署
為大將軍冀州牧三月健置司隸校尉官分遣使者問
民疾苦搜羅雋異寬重歛之稅弛離宮之禁罷無用之
器去侈靡之服凡趙之苛政不便於民者悉除之夏四
月杜洪張琚遣使招晋梁州刺史司馬勲勲率步騎三
萬自漢中入秦川健禦之於五丈原勲屢戰皆敗退歸
南鄭健以中書令賈玄碩始者不上尊號銜之使人告
玄碩與司馬勲通并其諸子皆殺之是年野蠶成繭野

禾被原百姓採野繭而衣野粟而食關西家給人足

皇始二年春正月丞相雄等固請健正尊號宜依漢晉
兼皇王之美不可過自謙冲同趙之初號健從之僭即
皇帝位於太極殿大赦境內諸公皆進爵為王且言單
于所以統一百蠻非天子所宜領以授太子萇立五等
之封以次進之司馬勲既還漢中杜洪張琚屯宜秋洪
自以右族輕琚且知勲憚琚兵強因說勲曰不殺張琚
關中非國家有也勲乃偽請琚於坐殺之琚弟光走池

陽合衆攻勲勲頻戰不利杜洪遂自立為秦王改元建
昌署置百官夏四月以張遇為征東大將軍豫州牧五
月健率步騎二萬攻杜洪於宜秋斬之還登石安原而
嘆曰美哉斯原也悵然有終焉之志六月甲申健還長
安晉鎮西將軍謝尚攻豫州牧張遇於許昌遇遣使請
救健遣丞相東海王雄衛大將軍平昌王菁率衆掠地
關東并率步騎二萬援之丁亥與尚戰於潁水之誠橋
尚等敗績奔還淮南死者萬五千人雄乘勝遂北至於

壘門殺傷過半秋七月雄徙遇及陳頴許洛之民五萬

餘戶歸於關中

或作長安

以右衛將軍楊群為豫州刺史鎮

許昌八月健以雷弱兒為大司馬毛貴為太尉張遇為
司空冬十月謝尚遣冠軍將軍王俠攻許昌克之豫州
刺史楊群退屯弘農十二月丞相雄攻王擢於隴上敗
之擢單馬奔涼州雄還屯隴東初有童謠曰十斗二升
沙誰為王擢家至是而擢敗

皇始三年春正月下書曰其自公卿已下歲舉賢良方

正孝廉清才多略博學秀才異行各一人或獻書規諫或面陳朕過其悉以聞勿拘貴賤二月張重華遣將軍張弘宋修會王擢帥步騎萬五千來伐雄與菁率衆拒之大敗涼兵於龍黎斬首萬二千級獲弘修送長安王擢棄秦州奔姑臧健以領軍將軍願為秦州刺史鎮上邽三月西域胡劉康詐稱劉曜子聚衆於平陽僞稱晉王夏四月左衛將軍飛討擒之五月王擢復帥衆二萬攻上邽秦州郡縣多應之願戰敗奔長安六月左衛將

軍飛攻氏王楊初於仇池為初所敗丞相雄平昌王菁
帥步騎四萬屯於隴東初張遇自許昌來奔健納遇繼
母韓氏為昭儀數于眾中謂遇曰卿吾假子也遇慙恨
因雄等精兵在外陰結關中豪傑欲滅苻氏以雍州歸
晉秋七月遇與中黃門劉晃謀夜襲健晃約開門以待
之會健使晃出外晃固辭不得已而行遇不知引兵至
門門不開事覺伏誅於是孔特起池陽劉珍夏侯顯起
鄠喬秉起雍胡陽赤起司竹呼延壽起霸城眾數萬人

各遣使詣晉大司馬征西將軍桓溫中軍將軍殷浩請

救八月以左僕射魚遵為司空九月丞相雄帥衆二萬

還長安遣平昌王菁略地上洛置荊州於豐陽縣以步

兵校尉金城郭敬為荊州刺史引南金奇貨弓竿漆蠟

通關市來遠商於是國用充足異賄盈積去冬十月丞

相雄與清河王法及左衛將軍飛分討孔特等健兄子

輔國將軍黃眉自洛陽來奔十一月雄克池陽斬孔特

十二月清河王法與左衛將軍飛克鄆斬劉珍夏侯顯

皇始四年春正月辛酉丞相雄克司竹胡陽赤奔瀾城
依呼延壽二月乙丑晉大司馬桓溫統步騎四萬發江
陵水軍自襄陽入均口至南鄉步兵自淅川趨武關命
司馬勲出子午道趨長安三月溫遣別將攻上洛獲荆
州刺史郭敬進擊青泥城破之冊府元龜作溫遣京兆
太守薛珍擊青泥城破
之司馬勲掠秦西鄙涼秦州刺史王擢攻陳倉以應溫
健遣太子萇丞相雄淮南王生平昌王菁北平王碩帥
衆五萬拒溫於峽柳城愁思堆長安志云後
夏四月已

亥戰於藍田淮南王生單騎突陳出入以十數殺溫將
應誕劉泓士卒死者甚衆溫督軍力戰甚衆大敗丞相
雄與溫別將桓冲戰於白鹿原為冲所敗溫遂轉戰而
前壬寅進至灞上萇等退屯城南健與老弱六千固守
長安小城悉發精兵三萬為遊軍遣大司馬雷弱兒等
與萇合兵拒桓三輔郡縣爭持牛酒迎降於溫溫撫諭
居民使安堵復業男女夾路觀之耆老有感泣者曰不
啻今日復覩官軍健別遣雄帥騎七千馳襲司馬勲於

子午谷破之勲退屯女媧堡五月王擢拔陳倉殺健扶
風內史毛難丞相雄復與桓冲戰於白鹿原冲師敗績
死者萬餘人初溫恃秦麥熟以為軍資而健悉芟麥清
野以待之軍糧不屬士卒乏食六月丁丑溫徙關中三
千餘戶而還呼延毒帥衆一萬從溫萇等又追擊之比
至潼關溫軍屢敗失亡萬計丞相雄擊司馬勲王擢於
陳倉勲奔漢中擢奔略陽遂攻喬叟於雍丙申雄卒太
子萇攻叟於雍八月斬之關中悉平以光祿大夫趙俱

為洛州刺史鎮宜陽先是月奄填星在輿鬼占者曰秦有兵革之象會溫來伐至是而退健賞拒溫之功以雷弱兒為丞相毛貴為太傅魚遵為太尉淮南王生為中軍大將軍平昌王菁為司空其年西虜乞沒渾邪遣子入侍健於是置來賓館於平朔門以懷遠人起靈臺於杜門與百姓約法三章薄賦卑宮垂心政事數延公卿咨講治道承趙人苛虐奢侈之後易以寬簡節儉崇禮耆老修尚儒學秦人大悅太子萇拒桓溫為流矢所中

冬十月薨卒諡曰獻哀十一月王擢帥衆來降健以擢
為尚書以上將軍啖鐵為秦州刺史健叔父武都王安
自晉還為姚襄所虜以為洛州刺史十二月安自襄亡
歸健以安為大司馬驃騎大將軍并州刺史鎮蒲阪是
歲關中大饑米一斗直布一疋

皇始五年春二月蝗虫大起自華澤西至隴山食百草
無遺牛馬相噉毛虎狼食人行路斷絕健自蠲百姓租
稅減膳徹懸素服避正殿新平有長人見長五丈語於

百姓張靖曰苻氏應天受命今當太平外面者歸中而
安泰問其姓名弗答俄而不見新平令以聞健以為妖
妄詔靖繫獄會大雨霖河渭汎溢蒲坂津監寇登於河
中得大屐一隻長七尺三寸足跡稱屐指長尺餘文深
一寸健嘆曰覆載之中何所不有張靖所見定不差也
赦之夏四月河內太守王會黎陽太守韓高以郡叛降
於燕立淮南王生為太子以司空平昌王菁為太尉尚
書令王墮為司空司隸校尉梁楞為尚書令六月丙子

健寢疾庚辰平昌王菁勒兵入東宮將殺太子生而自立時生侍疾西宮菁以健為已卒攻東掖門健聞變登端門陳兵自衛衆見健惶懼皆舍仗逃散健執菁數而殺之餘無所問壬午以大司馬武都王安都督中外諸軍事甲申健引太師魚遵丞相雷弱兒太傅毛貴司空王墮尚書令梁粲左僕射梁安右僕射段純吏部尚書辛牢等囑以後事受遺輔政健謂太子生曰六夷酋帥及大臣執權者若不從汝命宜漸除之乙酉薨於太極

前殿在位五年年四十九

一作三十九

葬原陵謚曰明皇帝

廟號世宗永興初追尊曰景明皇帝號高祖

十六國春秋卷三十四

十六國春秋卷三十五

前秦錄三

苻生

苻生字長生健之第三子也封淮南王幼而麤暴昏醉
無賴祖洪甚惡之生無一目為兒童時年七歲洪戲之
問侍者曰吾聞瞎兒一淚信乎侍者曰然生怒引佩刀
自刺出血曰此亦一淚也洪大驚鞭之生曰性耐刀槊

不堪鞭捶洪曰汝為爾不已吾將以汝為奴生曰可不
如石勒也洪懼跣而掩其口謂其父健曰此兒狂勃宜
早除之不然長大必破人家健將殺之健弟雄止之曰
兒長成自當修改何可遽爾如此健乃止及長力舉千
鈞雄勇好殺手格猛獸走及奔馬擊刺騎射冠絕一時
桓溫來伐生單馬入陣搃旗斬將者前後十數初健之
長子長既死母強氏意在少子柳健以識有三羊五眼
之言故立為太子皇始五年六月健卒僭即皇帝位大

赦境內改元壽光群臣奏曰先帝晏駕甫爾而即改元
非禮也生怒窮推議主得右僕射段純殺之秋七月尊
母強氏為皇太后立妻梁氏為皇后以太子門大夫南
安趙韶為右僕射太子舍人趙誨為中護軍著作郎董
榮為尚書並以佞倖進也八月生封所善衛大將軍黃
眉為廣平王前將軍飛為新興王徵呂婆樓為侍中左
大將軍大司馬武都王安領太尉晉王柳為征東大將
軍并州牧鎮蒲阪魏王庾為征東大將軍豫州牧鎮陝

城自餘封授有差初生將強懷與桓溫戰沒其子延未及封而健死會生出遊懷妻樊氏於道上書論懷忠烈請封其子生怒射而殺之中書監胡文中書令王魚言於生曰此頻有客星孛於大角熒惑入於東井大角為帝坐東井秦之分野於占不出三年國有大喪大臣戮死願陛下遠追周文修德以禳之惠和群臣以成康哉之美生曰皇后與朕對臨天下可以應大喪矣毛太傅梁車騎梁僕射受遺輔政可以應大臣矣九月殺皇后

梁氏及太傅錄尚書毛貴

后之舅也

車騎將軍尚書令梁楞

左僕射梁安冬十一月以吏部尚書辛牢守尚書令右僕射趙韶為左僕射尚書董榮為右僕射中護軍趙誨為司隸校尉十二月殺丞相雷弱兒及其九子二十七孫於是諸羗皆有離心生雖在諒闇遊飲自若荒耽淫虐殺戮無道常彎弓露刃以見朝臣錘鉗鋸鑿可以害人之具備置左右即位未幾后妃公卿已下至於僕隸凡殺五百餘人截脛拉脇鋸項剝胎者比比有之

壽光二年春正月嬖臣右僕射董榮言於生曰日蝕之變宜以責臣應之生曰唯有大司馬國之懿戚不可其在王司空乃殺司空王墮洛州刺史杜郁墮之甥也左僕射趙韶惡之譖於生以為貳於晉殺之壬戌宴群臣於太極殿酣飲樂奏生親歌以和之命尚書令辛牢為酒監既而怒曰何不強人酒而猶有坐者引弓射牢殺之百寮大懼莫不引滿昏醉汚服失冠蓬頭僵仆生乃大樂二月生聞張祚見殺立覲幼冲命征東大將軍晉

王柳遣叅軍閻負梁殊使涼以書喻之負殊至姑臧玄
靚年幼不見殊等涼州牧張瓘見之曰孤之本朝世執
忠節遠宗大晉臣無境外之交二君何以來辱負殊曰
晉王與君鄰藩義好有自來矣雖山河阻絕然風通道
會不欲使羊陸二公獨美於前主上以欽明紹統八表
宅心光被四海功格天地晉王思與張王齊曜大明交
玉帛之好兼與君公同金蘭之契是以不遠而來君何
怪焉瓘曰羊陸一時之事亦非純臣之義也本朝六世

重光固忠不貳若與苻征東通使是上違先公純誠之志下乖河右遵奉之情其可乎負殊曰昔微子去殷項伯歸漢雖背君違親前史美其先覺亡晉之餘遠逃江會天命去之淪絕已久故尊先王翻然改圖北面二趙蓋神算無方見機而作也今大秦威德方盛君公若欲自尊河右則衆旅非秦之敵如欲宗歸遺晉則深乖先君雅旨曷若遠蹤竇融附漢之規近述先王歸趙之事垂祚無窮永延遐祉乎璿曰中州無信好食誓言往與

石氏通好使車適返戎騎已至中國之風誠在昔日不足復論通和之事也負殊曰三王異政五帝殊風趙多姦詐秦崇信義豈得一槩待之乎張光楊初皆擅兵一方不供王貢先帝命將擒之赦其難恕之罪寵以爵封之榮今上道合二儀慈弘山海信符陰陽御物無際不可以二趙相況也瓘曰必如君言秦之威德無敵何不先取江南則天下盡為秦有征東何辱命焉負殊曰先帝以大聖神武開構鴻基強燕納款八州效順主上欽

明道必隆世慨徽號擁於河西正朔未加吳會以吳必
須兵服涼可以義懷故遣行人先申大好如君公未達
天命正可緩江南數年之命迴師西旆恐涼州弗可保
也瑾曰我跨據三州帶甲十萬西包蔥嶺東阻大河伐
人有餘而況自守何畏於秦負殊曰貴州山河之固孰
若崤函五郡之衆孰若秦雍杜洪張琚因趙氏之成資
據天阻之險固策三秦之銳藉陸海之饒勁士風集驍
騎如雲兵強財富自謂天下可平關中可守有囊括宇

內席卷四海之志先帝戎旗西指冰消雲散人詠來蘇
旬月之間不覺易主燕雖虎視關東猶以地勢之義逆
順之理北面稱藩貢不踰月致肅慎楮矢通九夷之珍
單于屈膝名王內附主上若以貴州不服赫然奮怒控
弦百萬鼓行西濟未知貴州將何以抗之盍追先王臣
趙故事世享大義為秦西藩瓘曰然秦之德義加於天
下江南何以不賓負殊曰文身之俗負阻江山道汚先
叛化盛後賓自古而然豈但今也故詩曰蠢爾蠻荆大

邦為仇言其不可以德義懷也。瓘曰：秦據漢舊都地，魚將相文武輔臣領袖一時者，誰也？負殊曰：皇室懿藩忠若公旦者，則大司馬武都王安；征東大將軍晉王柳文、武兼才、神器秀拔，入可允釐百工，出能折衝萬里者，衛大將軍廣平王黃眉、後將軍清河王法龍驤、將軍東海王堅之兄弟，其耆年碩德德侔尚父者，則太師錄尚書事廣寧公魚遵、清素剛嚴骨硬貞亮者，則左光祿大夫強平、金紫光祿大夫程肱、牛夷博聞多識探賸索幽者，

則中書監胡文中書令王魚黃門侍郎李柔雄毅厚重
權智無方者則左衛將軍李威右衛將軍雅才識明達
令行禁止者則特進領御史中丞梁平老特進光祿大
夫強汪侍中尚書呂婆樓文史富贍鬱為文宗者則尚
書右僕射董榮秘書監王勣著作郎梁譔驍勇多奇略
攻必取戰必克關張之流萬人之敵者則前將軍新興
王飛建節將軍鄧羌立忠將軍彭越安遠將軍范俱難
建武將軍徐盛常伯納言卿校牧守則人皆文武莫非

才賢其餘懷經世之才蘊佐時之略守南山之操遂而不奪者王猛朱彤之倫相望於巖谷濟濟多士焉可罄言姚襄張平一時之傑各擁數萬狼顧偏方委忠獻款請為臣妾小不事大春秋所誅惟君公圖之瓘曰茲事當決之於王非身所了負殊曰涼王雖英睿夙成然年在幼冲君公居伊霍之任安危所係見機之義實在君公耳瓘新輔政河西所在兵起懼秦師之至乃以玄靚之命遣使稱藩生因其所稱官爵而授之燕王慕容儁

遣將軍慕輿長卿等帥衆七千人自軹關攻幽州刺史

强

晉書
作張

哲於裴氏堡晉將軍劉

晉書
作王

度帥衆四千攻青

州刺史王

晉書
作袁

朗於盧氏堡生遣前將軍新興王飛拒

度建節將軍鄧羗拒長卿飛未至而度退羗及長卿戰

於堡南大破之獲長卿及甲首二千七百餘級姚襄帥

衆萬餘攻平陽太守產於匈奴堡晉王柳叔之為襄所

敗引還蒲阪襄進攻堡克之殺產盡坑其衆遣使從生

假道將還隴西生將許之東海王堅諫曰姚襄人傑也

今還隴西必為深患不如誘以厚利伺隙擊之生乃止
遣使拜襄官爵襄不受斬其使者焚所送章冊寇掠河
南生怒命大將軍張平討之襄乃卑辭厚幣與平結為
兄弟更與秦通和三月生發三輔人治渭橋金紫光祿
大夫程肱以妨農害時上疏切諫生怒殺之夏四月長
安大風發屋拔樹行人顛頓宮中奔擾或稱賊至宮門
晝閉五日乃止生推告賊者殺之剗出心胃生舅左光
祿大夫強平切諫曰元正盛旦日有蝕之正陽神朔昏

風大起，魚之水旱不時，獸災未息。此皆由陛下不勉強於政事，乖和氣所致也。願陛下務養元元，平章百姓，棄纖芥之嫌，舍山岳之過，致敬宗廟，愛禮公卿。去秋霜之威，垂三春之澤，則奸回寢止，妖祲自消。乾靈祇祐，皇家永保無窮之美矣。生怒以為妖言，鑿其頂而殺之。衛將軍廣平王黃眉前將軍新興王飛建節將軍鄧羌侍讌禁中，以平太后之弟叩頭固諫，生弗許出。黃眉為左馮翊，飛為右扶風。羌行咸陽太守，猶惜其驍勇，故皆弗殺。

五月太后強氏以憂憤卒諡曰明德六月生下書曰朕受皇天之命承祖考之業君臨萬邦子育百姓嗣統以來有何不善而謗讟之音扇滿天下殺不過千而謂之殘虐行者比肩未足為希方當峻刑極罰復如朕何時虎狼大暴從潼關西至於長安晝則斷道夜則發屋不食六畜專務食人自元年春至於二年夏凡殺七百餘人百姓苦之皆廢耕桑相聚邑居為害滋甚內外恟懼秋七月群臣奏請禳災生曰野獸饑則食人飽自當止

終不能累年為患也何禳之有且天豈不愛群生而年
年降罰正以百姓犯罪者多將助朕專殺而施刑教故
耳但勿犯罪何為怨天而尤人哉冬十月生如阿房遇
兄與妹俱行者逼令為非禮固執不從生怒殺之尚書
僕射賈玄石形貌美偉生與妻樓上望見玄石在庭中
妻曰此何人也生曰汝欲得也乃誅玄石嘗讌群臣於
咸陽故城有後至者皆斬之生夜食棗多至旦而有疾
召太醫令程延使診之延曰陛下無他疾食棗多耳生

怒曰嘻汝非聖人安知吾食棗乃殺之又使太醫某合
安胎藥問人參好惡并藥分多少曰雖小小不具自可
堪用生以為譏其目鑿其目出然後斬之常從輿上漉
便輦者謂之天雨

壽光三年春二月太白犯東井有司奏曰東井秦之分
野太白罰星必有暴兵起於京師生曰太白入井必將
渴耳何所怪乎夏四月姚襄將圖關中自北屈進屯杏
城遣輔國將軍姚蘭略地敷城曜武將軍姚益生左將

軍王欽盧招動定陽北地片川諸羌胡皆應之有衆二萬七千進據黃落生遣衛大將軍廣平王黃眉平北將軍道龍龍驤將軍東海王堅建節將軍鄧羌率步騎萬五千禦之生將飛龍擊蘭擒之襄深溝高壘固守不戰羌說黃眉曰傷弓之鳥落於虛發襄頻為桓溫張平所敗銳氣已竭今固壘不戰是窮寇也然其為人強狠易以剛動若鼓譟揚旗壓其壘門彼必忿怒而出可一戰擒也黃眉從之五月羌帥騎三千壓於襄壘襄果怒盡

銳出戰羌偽不勝引騎而退襄追之至於三原羌廻騎拒襄俄而黃眉與堅大衆繼至襄兵大敗時襄所乘駿馬曰鰲眉騮日行千里是戰也馬倒擒而斬之盡俘其衆弟萇帥衆來降襄載其父弋仲之柩在軍中生以王禮葬弋仲於孤磐亦以公禮葬襄廣平王黃眉等振旅還長安生不之賞數衆辱之黃眉怒謀殺生自立事覺伏誅事連王公親戚多有死者生夢大魚食蒲又長安謠曰東海有魚化為龍男便為王女為公問在何所洛

門東東海堅所封也時為龍驤將軍第在洛門之東生
不知是堅以謠夢之故誅侍中太師錄尚書事廣寧公
魚遵并其七子十孫時又謠曰百里望空城鬱鬱何青
青瞎兒不知法仰不見天星於是悉壞諸空城以禳之
法是符法也金紫光祿大夫牛夷懼不免禍求為荊州
出鎮上洛生不許曰公忠肅篤敬宜左右朕躬豈有外
鎮之理改為中軍將軍引見調之曰牛性遲重善持轅
輓雖無驥足動負百石夷曰雖服大車未經峻壁願試

重載乃知勲績生笑曰何其快也公嫌所載輕乎朕將
以魚公爵位處公夷懼歸而自殺生荒暴日滋殘虐彌
甚耽酒於酒無復晝夜群臣朔望朝謁漏盡請見生曰
日知盡乎須待飲訖罕有見者或日暮不出百僚饑弊
或至申酉乃出臨朝輒怒色厲惟行殺戮連月昏醉弗
堪省覽往往寢落醉中決事左右因以為奸賞罰無準
因醉問左右曰自吾臨天下以來汝等外間何所聞乎
或對曰陛下聖明宰世子育百姓賞必當功刑必當罪

天下唯歌太平未聞有怨生怒曰汝媚我也引而斬之
他日又問或對曰陛下刑罰微過又怒曰汝謗我也亦
斬之所幸妻妾小有忤旨輒便殺之流其尸於渭水或
使宮人與男子裸交於殿前引群臣臨而觀之或生剝
牛羊驢馬活爛鷄豚鵝鴨數十為群縱之殿前或剝死
囚面皮令其歌舞臨觀以為嬉樂宗室勲舊親戚忠良
殺害略盡王公在位者悉以疾告歸人情危駭道路以
目群臣奔走草野皆曰從虎口出左右得保一日如度

十年自以眇目所諱言者殘缺傷毀偏隻少無不足不
具之類皆不得道左右忤旨誤犯而死者不可勝紀六
月太史令康權言於生曰昨夜三月並出孛星入於太
微連於東井自去月上旬沉陰不雨迄至於今將有下
人謀上之禍深願陛下修德以消之生怒以為妖言撲
而殺之生夜坐對侍婢曰阿法兄弟亦不可信明當除
之侍婢以告堅及堅兄清河王法法遂與特進領御史
中丞梁平老特進光祿大夫強汪帥壯士數百人潛入

雲龍門堅與侍中尚書呂婆樓帥麾下三百餘人鼓譟
繼進宿衛將士皆舍杖歸堅生猶昏醉寢而未寐堅衆
既至生驚問左右曰此輩何等人左右曰賊也生曰賊
也何不拜之堅兵皆笑生又大言何不速拜不拜者斬
之堅衆引生置於別室廢為越王尋而殺之時年二十
三在位三年謚曰厲王封生子旼為越王以嗣之

十六國春秋卷三十五

十六國春秋卷三十六

前秦錄四

苻堅上

苻堅字永固一字文玉

或作名

健弟雄之第二子也趙建

武中洪從石虎徙鄴家於永貴里母苟氏嘗遊漳水祈
子於西門豹祠歸其夜夢與神交因而有孕十二月而
生堅有神光之異自天燭其庭堅背有赤文隱起狀如

篆文成字曰艸音草付臣又土王咸陽堅秘而莫之傳也

姿貌魁傑臂垂過膝目有紫光祖洪見堅狀貌奇而愛

之欲令頭堅腹軟字之曰堅頭堅或作肩年七歲聰敏好施

舉止不踰規矩每侍洪側輒量洪舉措取予不失機候

洪每謂健曰此兒姿貌瓌偉質性過人頭大鎮重身長

任大足短安下非常相也趙光祿大夫司隸校尉高平

徐統有知人之鑒遇堅於路異之執其手曰符郎此官

之御街小兒敢戲於此不畏司隸縛耶堅曰司隸縛犯

罪者不縛小兒戲也統顧左右曰此兒有伯王之相左
右怪之曰此兒狀貌甚醜而君以為貴相何異也統曰
非爾等所及知也後又遇之統下車屏人密謂之曰符
郎骨相不恒後當大貴但恨僕老不及見如何堅曰若
如公言不敢忘德八歲請就師學洪曰尚小未可吾年
十三方欲求師時人猶以為速成況汝戎狄異類世知
飲酒今乃求學耶欣而許之性至孝博學多才執年十
一便有經略大志健之西入關也次於曲沃夢天神遣

使者赤冠朱衣命拜堅為龍驤將軍翼日乃為壇於曲沃以授之健泣謂堅曰汝祖昔受此號汝父次為之今若復為神明所命可不勉之堅揮劍捶馬志氣感厲士卒莫不憚服於是要結儔傑以圖緯世之宜呂婆樓强汪梁平老等皆有王佐之才傾身禮之以為股肱羽翼太原薛讚略陽權翼見而驚曰非常人也及生嗣位讚翼說堅曰主上猜忍暴虐中外離心有德者昌無德者殃天之道也神器甚重方今宜主秦祀者非殿下而誰

願殿下順天人之心以行湯武之事勿使他姓得之堅
以問尚書呂婆樓婆樓曰僕刀鏢上人耳不足以辦大
事僕里舍有王猛其人謀略不世出殿下宜請而咨之
堅因婆樓以招猛一見如舊友語及時事堅大悅自謂
如劉玄德之遇諸葛孔明也生既殘虐無度特進領御
史中丞梁平老等亟以為言詳具平老傳堅遂與兄清河王
法謀殺生既而以位讓法法曰汝嫡嗣且賢宜立堅曰
兄年長宜立群臣皆頓首固請堅從之

永興元年夏六月堅去皇帝之號稱大秦天王即位於

太極殿誅生佞臣中書監董榮左僕射趙韶等二十餘

人大赦境內殊死已下遂以晉升平元年改元永興追

謚父雄為文桓皇帝母苟氏為皇太后妃苟氏為皇后

世子宏為皇太子以清河王法為使持節侍中都督中

外諸軍丞相錄尚書事東海公諸王皆降爵為公以從

祖右光祿大夫永安公侯為太尉從兄晉公柳為車騎

大將軍尚書令封弟融為陽平公雙為河南公子丕為

長樂公暉為平原公熙為廣平公叡為鉅鹿公漢陽李
威為衛將軍尚書左僕射梁平老為右僕射強汪為領
軍將軍仇騰為尚書領選席寶為丞相長史行太子詹
事呂婆樓為司隸校尉王猛為中書侍郎八月復以薛
讚為中書侍郎權翼為給事黃門侍郎與王猛並掌機
密九月追復魚遵雷弱兒毛貴王墮梁楞梁安段純辛
牢等悉復本官以禮改葬之子孫存者皆隨才擢授大
將軍冀州牧張平謀反據新平雁門河西太原上黨上

郡諸地壁壘三百餘夷夏十餘萬戶拜置征鎮欲與秦敵冬十月平帥衆掠境堅以晉公柳都督并冀州諸軍事加并州牧鎮蒲坂以禦之十一月丞相東海公法以疑忌賜死苟太后以法長且賢又得衆心懼終為變故遣殺之堅性友愛與法訣於東堂慟哭嘔血諡曰哀十二月堅行至尚書以文案不治免左丞程卓官以王猛代之於是修廢職繼絕世禮神祇課農桑立學校鰥寡孤獨高年不自存者賜穀帛有差其殊才異行孝友忠

義德業可稱者令所在以聞秦民大悅

永興二年春二月堅自將討張平以驍騎將軍鄧羌為
前鋒督護率騎五千據汾上平使養子張蚝禦之蚝多
力趨捷與羌相持旬餘莫能相勝三月堅至銅壁平悉
衆出戰堅鷹揚將軍呂光刺蚝中之鄧羌擒蚝以獻平
衆大潰懼而請降堅赦其罪署為右將軍蚝為虎賁中
郎將徙平所部三千餘戶於長安夏四月堅如雍祠五
時六月如河東祠后土秋八月自臨晉登龍門顧謂群

臣曰美哉山河之固婁敬有言關中四塞之國真不虛也權翼薛讚對曰臣聞夏殷之都非不險也周秦之衆非不多也終於身竄南巢首懸白旗軀殘於犬戎國分於項籍者何也德之不修故耳吳起有言在德不在險深願陛下追蹤唐虞懷遠以德山河之固不足恃也堅大悅至韓原觀晉魏顆鬼結草抗秦軍之處賦詩而歸九月庚辰堅還長安以太尉永安公侯守尚書令賜為父後者爵一級鰥寡高年穀帛有差丐所過田租之半

是秋大旱堅減膳徹樂金玉綺繡皆散之戎士命后妃
以下悉去羅紈衣不曳地開山澤之利公私共之息兵
養民旱不為災王猛日親幸用事宗親勲舊莫不嫉之
諸氏紛紜競陳猛短堅恚甚慢罵或有鞭撻於殿庭者
權翼進曰陛下宏達大度善馭英儔神武卓犖錄功捨
過有漢祖之風然慢易之言所宜除之堅笑曰朕之過
也自是公卿以下見猛屏息

甘露元年春正月起明堂禪南北郊祀其祖洪以配天

宗祀其伯健於明堂以配上帝二月親耕藉田皇后苟

氏親蠶於南郊平羌護軍高離據略陽叛永安公侯率
衆討之未克而卒謚曰威夏四月驍騎將軍鄧羌秦州
刺史啖鐵討平之五月堅如河東南遊霸陵顧謂群臣
曰漢祖起自布衣廓平四海佐命功臣孰為首乎權翼
進曰漢書以蕭曹為功臣之冠堅曰漢祖與項羽爭天
下困於京索之間身被七十瘡通中六七父母妻子為
楚所困平城之下七日不火食賴陳平之謀太上妻子

克全免匈奴之禍二相何得獨高也雖有人狗之喻豈
黃中之言乎於是酣飲極歡命羣臣賦詩六月甘露降
乃大赦境內殊死已下改元為甘露秋七月堅自河東
還以驍騎將軍鄧羗為御史中丞八月下書曰咸陽內
史王猛言彰出納所在著績有卧龍之才宜入贊百揆
綵綸王言可徵拜侍中中書令領京兆尹特進光祿大
夫強德健后之弟也酗酒豪橫掠人財貨子女為百姓
患猛下車收德奏未及報已陳尸於市堅馳使赦之不

及猛與中丞鄧羌同志疾惡無所顧忌數旬之間權儔

貴戚殺戮刑免者二十餘人百僚震栗姦猾屏氣路不

拾遺風化大行堅歎曰吾今始知天下之有法天子之

為尊也乃以猛為吏部尚書尋遷太子詹事冬十一月

轉左僕射餘官如故十二月以猛為輔國將軍司隸校

尉居中宿衛僕射詹事侍中中書令領選如故猛上疏

辭曰伏見散騎常侍陽平公融明德懿親光祿散騎西

河任群忠貞淑慎處士京兆朱彤博識聽辨並宜左右

彌綸暉贊九棘愚臣庸鄙請避賢路堅曰機務俟才允
屬明哲朝野所望豈容致辭所舉融等尋別銓叙於是
以融為侍中中書監左僕射任群為光祿大夫領太子
家令朱彤為尚書侍郎領太子庶子猛時年三十六歲
中五遷權傾内外人有毀之者堅輒罪之於是群臣莫
敢復言以左僕射李威領護軍右僕射梁平老為使持
節都督北垂諸軍事鎮北大將軍戍朔方之西丞相司
馬賈雍為雲中護軍戍雲中之南遣使巡察四方及戎

夷種落州部有高年孤寡不能自存長吏刑罰失中為
百姓所苦清修疾惡勸課農桑有便於俗篤學至孝義
烈力田者皆令條具以聞

甘露二年春正月堅分司隸置雍州又分京兆為咸陽
郡置渭南縣屬京兆郡二月以河南公雙為都督雍河
涼三州諸軍事征西大將軍雍州刺史改封趙公鎮安
定封弟忠為河南公三月匈奴左賢王劉衛辰遣使來
降請田內地春來秋返堅許之夏四月雲中護軍賈雍

遣司馬徐斌率騎襲之因縱兵掠奪堅怒曰朕方修魏
絳和戎之術不可以小利忘大信昔荆吳之戰事興蠶
婦澆瓜之惠梁宋息兵夫怨不在大事不在小擾邊動
衆非國之利也所獲資產其悉以歸之乃黜雍官以白
衣領職遣使修和示之信義衛辰於是入居塞內貢獻
相尋冬十月烏桓獨孤部鮮卑沒奕于各帥衆數萬來
降堅初欲處之塞內陽平公融諫曰鮮卑異類人面獸
心不知仁義其稽顙內附實貪地利非懷德也不敢犯

邊實憚兵威非感恩也今處之於塞內與民雜居彼窺郡縣虛實必為邊患不如徙之塞外以存荒服之義堅從之

甘露三年春正月劉衛辰掠邊民五十餘口為奴婢來

獻堅責之使歸所掠衛辰由是叛附於魏

時猶稱代

秋九月

乙亥鳳凰集於東闕大赦境內百僚進位一級民因歌

之曰鳳凰於飛其翼翼翊我聖后饗齡萬億初堅將為赦與左僕射猛右僕射融密議於露臺悉屏左右親

為赦文猛融供進紙筆有一大蒼蠅入自牖間鳴聲甚大集於筆端驅而復來堅惡之久之乃去俄而長安街巷市里民相告曰官今大赦有司以聞堅驚謂猛融曰禁中無耳屬之理事何從而洩於是勅內外推窮之咸言有一小人衣黑衣大呼於市曰官今大赦須臾不見堅嘆曰其向蒼蠅乎聲狀非常吾固惡之諺曰欲人勿知莫若勿為聲無細而弗聞事未形而必彰者其此之謂也冬十二月廣修學官詔郡國學生通一經已上充

之公卿已下子孫並遣受業命牧守宰各舉孝悌力田
清修廉直學為通儒才堪幹事者皆旌表之察其所舉
得人者賞非其人者罰由是人莫敢妄舉而請托不行
士皆自勵雖宗室外戚無才能者盡棄不用當是之時
內外群臣率皆稱職田疇修闢倉廩充盈盜賊屏息典
章法物莫不悉脩

甘露四年夏五月堅親臨大學考諸生經義優劣品而
第之問難五經博士多不能對堅謂博士王寔曰朕一

月三臨太學黜陟幽明躬親獎勵因敢勸違庶幾周孔
微言不由朕而墜漢之二武其可追乎寔曰自劉石擾
覆華畿二都鞠為茂草諸生罕有或存墳籍滅而莫紀
經淪學廢奄若秦皇陛下神武撥亂道隆虞夏開庠序
之美弘儒教之風化盛隆周垂馨千祀漢之二武焉足
論哉自是每月一臨太學諸生兢相勸勵秋七月黃龍
見於成紀梁山崩是年造刀一口用五千工銘曰神術
隸書

甘露五年白虎見於天水

甘露六年夏六月遣大鴻臚拜張天錫為大將軍涼州牧西平公秋八月汝南公騰謀反伏誅騰生之弟也是時生弟晉公柳等猶有五人王猛言於堅曰不去五公終必為患堅不從屠各張罔聚衆數千自稱大單于寇掠郡縣堅以尚書鄧羌為建節將軍帥衆七千討平之九月命公國各署三卿并餘官皆聽自采辟獨為置郎中令富商趙掇丁妃鄒甕等家累千金車服之盛擬則

王侯諸公競引之為國貳卿黃門侍郎安定程憲言於
堅曰趙掇等皆商賈醜豎市郭小人車馬衣服僭同王
者官齊君子為藩國列卿傷風敗俗有塵聖化宜肅明
典法使清濁顯分堅乃下詔稱本欲使諸公延選英儒
乃更猥濫如是其令有司推檢引掇等為國卿者皆降
其爵自今國官皆委之銓衡自非命士已上不得乘車
馬去京師百里內工商卑隸婦女不得服金銀錦繡犯
者棄市於是平陽平昌九江陳留安樂五公皆降爵為

侯

建元元年春正月大赦境內殊死已下改元為建元雍
州秀才段鏗等對策上第拜吏部郎中孝廉通經者十
餘人皆拜令長三月燕太宰慕容恪吳王慕容垂攻拔
咸陽略地至崤澠關中大震堅親屯陝城以備之夏六
月匈奴右賢王曹轂左賢王劉衛辰舉兵叛轂帥衆二
萬攻杏城已南郡縣屯馬蘭山索虜烏延等亦叛堅而
通於辰轂堅率中外精銳討之使衛大將軍李威左僕

射王猛輔太子宏留守長安以前將軍楊安鎮軍將軍
毛盛為前鋒都督秋八月轂遣弟活拒戰於同川安大
敗之斬首四千餘級轂懼請降徙其酋豪六千餘戶於
長安進擊烏延斬之建節將軍鄧羌討衛辰擒之於木
根山九月堅自聰馬城如朔方巡撫諸夷冬十月征北
將軍淮南公幼帥杏城之衆乘虛襲長安李威擊斬之
十一月堅還長安以李威守太尉加侍中以曹轂為雁
門公劉衛辰為夏陽公各使統其部落轂尋死分其部

落貳城已西二萬餘落封其長子璽為駱川侯貳城已東二萬餘落封其小子寅為力川侯故號東西曹

建元二年秦雍二州地震裂水泉湧出金像生毛長安

大風震電壞屋殺人堅懼而愈修德政夏五月魏昭成

帝諱什翼捷時稱代王遣長史燕鳳詣秦通好或作貢鳳字子章代

人也少好學博綜經史明習陰陽讖緯昭成帝素聞其

名使人以禮迎之鳳不應聘乃命諸軍圍代城謂城中

人曰燕鳳不出者吾將屠汝代人懼送鳳出之拜左長

史參軍國事時堅遣牛恬聘魏魏令鳳報之堅問曰代
王何如人鳳曰寬和仁愛經略高遠一時之雄主也常
有并吞天下之志堅曰卿輩北人無剛甲利器敵弱則
進敵強則退安能并兼耶鳳曰北人壯悍上馬持三仗
驅馳若飛王上雄雉率服北土控弦百萬號令若一軍
無輜重樵爨之苦輕行速捷因敵取資此南方之所以
疲敝而北方之所以常勝也堅曰彼國人馬實為多少
鳳曰控弦之士四十餘萬見馬一百萬匹堅曰卿言人

衆可圖說馬太多是虛辭耳鳳曰雲中川自東山至西
河二百里北山至南山百有餘里每歲孟秋馬常大集
略為滿川以此推之使人之言猶當未盡鳳還堅厚加
贈遺秋七月堅遣輔國將軍王猛前將軍楊安揚武將
軍姚萇等帥衆二萬寇荊州攻南鄉郡晉荊州刺史桓
豁救之八月軍於新野掠安一作漢陽民萬餘戶而還

建元三年春二月羌歟岐叛堅自稱益州刺史帥部落
四千餘家西依張天錫叛將李儼堅遣輔國將軍王猛

隴西太守姜衡南安太守南安邵羗揚武將軍姚萇等
帥衆萬七千討歛岐於略陽三月張天錫帥步騎三萬
擊李儼攻克大夏武始二郡其征東將軍常據又敗儼
兵於葵谷儼懼退守枹罕遣兄子純謝罪於堅且請救
歛岐部落先屬姚弋仲聞姚萇至皆降王猛攻破略陽
歛岐奔白馬堅以萇為隴東太守夏四月堅使前將軍
楊安建威將軍王撫帥騎二萬會王猛救儼猛遣邵羗
追歛岐王撫守候和姜衡守白石猛與楊安救枹罕與

天錫將楊適戰於枹罕東猛大破之俘斬萬七千級天
錫遂引師西歸邵充擒歛岐於白馬送之長安李儼將
賀耽說儼曰以明公神武將士驍悍奈何束手于人王
猛孤軍深入士卒疲弊且以我請救必不設備若乘其
怠而擊之可以得志儼曰求救於人以免難難既免而
擊之天下其謂我何不若固守以老之彼將自退乃憑
城固守不納秦師猛白服乘輿從者數十人請與相見
儼開門延之未及設備將士繼入遂執儼猛責儼以不

即出迎儼以賀肫之謀告猛乃斬肫送儼歸長安堅以儼為光祿勳賜爵歸安侯以立忠將軍彭越為平西將軍涼州刺史鎮枹罕九月初淮南公幼之反也征東大將軍并州牧晉公柳起兵蒲阪征西大將軍秦州刺史趙公雙起兵上邽皆與之通謀堅以雙母弟至親柳健之愛子隱而不問柳雙復與鎮東將軍洛州刺史魏公庾安西將軍雍州刺史燕公武作亂庾反於陝城武反於安定鎮東主簿南安姚眺諫曰明公以周邵之親受

方面之任國家有難當竭力除之況自為難乎庾不聽
堅聞之徵柳等還長安冬十月柳據蒲阪雙據上邽庾
據陝城武據安定皆舉兵向長安堅遣使諭之曰吾待
卿等恩亦至矣何苦而反今止不徵卿宜罷兵各定其
位一切如故各齧梨以為信皆不從堅阻兵自守十一
月魏昭成帝擊劉衛辰時河冰未成乃以葦絙約澌俄
然冰合猶未能固乃散葦於上冰草相結如浮橋焉衆
軍利涉出其不意衛辰帥衆來奔堅送衛辰還朔方遣

兵戍之

建元四年春正月遣後將軍楊成世左將軍毛嵩討上
邽輔國將軍王猛建節將軍鄧羌攻蒲阪前將軍楊安
廣武將軍張蚝攻陝城堅命蒲阪之軍皆距城三十里
堅壁勿戰俟秦雍已平然後并力取之二月魏公庾以
陝城降燕請兵應接秦人大懼三月楊成世為趙公雙
將苟興所敗毛嵩亦為燕公武所敗奔還堅復遣武衛
將軍武都王鑒寧朔將軍呂光將軍馮翊郭將翟倕等

帥中外精銳三萬討之左衛將軍雅左禁將軍竇衝率羽林騎七千繼發夏四月雙武乘勝至於榆眉以苟興為前鋒鑒欲速戰光曰興新得志氣勢方銳宜持重以待之彼糧盡必退退而擊之蔑不濟矣二旬而興退光曰興可擊矣遂追之興敗進擊雙武大破之斬獲萬五千級武棄安定與雙皆奔上邽鑒等進攻之晉公柳數出跳戰猛閉壘不應柳以猛為憚已五月留世子良守蒲阪率衆二萬西趨長安長安去蒲阪百餘里鄧羌帥

精騎七千夜襲敗之柳引軍還猛又盡衆邀擊悉俘其卒柳與數百騎入於蒲阪猛羌進攻之秋七月鑒等攻克上邽斬趙公雙燕公武宥其妻子以左衛將軍雅為秦州刺史八月以長樂公丕為雍州刺史九月王猛等攻拔蒲阪斬晉公柳及其妻子傳首長安猛屯蒲阪遣鄧羌與王鑒等會攻陝城冬十一月羌等拔陝城獲魏公庾送於長安堅問其所以反對曰臣本無反心但以弟兄屢謀逆亂臣懼并死故謀反耳堅泣曰汝素長者

固知非汝心也且高祖不可以無後乃賜庾死原其七
子以長子襲魏公餘子皆封縣公以嗣越厲王及諸弟
之無後者苟太后曰庾與雙俱反雙獨不得置後何也
堅曰天下者高祖之天下高祖之子不可以無後至於
仲群不顧太后謀危宗廟天下之法不可私也以范陽
公抑為征東大將軍并州刺史鎮蒲阪鄧羌為建武將
軍洛州刺史鎮陝城擢姚眇為汲郡太守時仇池公楊
世遣使稱臣遂以世為南秦州刺史是歲池陽民某惑

其婦言而欲殺母遂車載母辭詣親家乃入南山母曰
汝詣親家何至是也兒曰老婢何言遂下母於溪谷之
間脫衣將殺之初婦謂其夫曰不可不得中夜來也兒
不欲自脫背坐厲聲令母自脫母曰我生養汝至於今
日汝信婦言枉殺我可不乞我此衣兒怒曰老婢復何
言母呼曰天神山神當見此否言未卒聲忽見所持刀
反貫其項而殺之投於山穴母乘車卻歸昏而反家婦
為其夫還逆問曰得中夜來否母馳告隣人收其婦送

官郡縣以聞堅驚曰宇宙之內乃有此事將非怪乎於是輟而殺之

建元五年夏六月晉大司馬桓溫帥師伐燕慕容暉遣散騎常侍李鳳求救於秦秋七月溫進次枋頭暉衆屢敗又遣散騎侍郎樂嵩詣秦乞師請割武牢以西之地堅引群臣議於東堂皆曰昔桓溫伐我至灞上燕不救我今溫伐燕我何救焉且燕不稱藩於我我何為救之猛密言於堅曰燕雖強大慕容評非溫敵也若舉兵山

東進屯洛邑收幽冀之兵引并豫之衆觀兵崤澠則陛下大事去矣今不如與燕合兵退溫溫退燕亦病矣然後我承其弊而取之不亦善乎堅從之八月遣將軍苟池洛州刺史鄧羌帥步騎二萬救燕出自洛陽趨潁川遣散騎侍郎姜撫報使於燕以王猛為尚書令九月苟池等邀擊溫於譙大破之死者萬計溫師敗績乃引而還燕秦結好使相往來燕散騎常侍郝晷結事黃門侍郎梁琛相繼來聘晷與王猛有舊猛接以平生問晷東

方之事畧知燕之將亡陰欲自計頗淺其事琛至長安

猛勸堅留琛堅不許

詳具琛傳

是月京兆尹王攸上書獻十

略一曰君道宜明二曰臣尚忠敬三曰子貴孝養四曰

民生在勤五曰教無偏黨六曰養民在惠七曰延聘耆

賢八曰懲惡顯善九曰伐叛討逆十曰易簡弘大堅納

之以攸為諫議大夫冬十一月燕車騎將軍慕容垂避

害來奔堅聞垂至大喜郊迎執手甚厚禮之賞賜鉅萬

王猛言於堅曰慕容垂燕之戚屬世雄東部寬仁惠下

恩結士庶燕趙之間咸有奉戴之意觀其才略權智無
方兼其諸子明毅有幹藝人之傑也蛟龍猛獸非可馴
之物若借以風雲將不可復制不如早除之堅曰吾方
以義致英豪建百世之功且其初至吾告之至誠今而
害之人將謂我何乃以垂為冠軍將軍封賓徒侯堅復
遣黃門郎石越聘燕且索地於燕初燕人許割虎牢以
西之地賂秦晉兵既退燕人悔之堅大怒遣輔國將軍
王猛建威將軍梁成

梁平老
之子也

建武將軍鄧羌帥步騎三

萬伐燕以慕容垂為鄉導十二月猛等攻燕荊州刺史
武威王慕容筑於洛陽

建元六年春正月慕容垂世子令奔燕王猛遺慕容筑
書曰國家今已塞成臯之險杜盟津之路大駕虎旅百
萬自軹關取鄴都金墉窮戍外無救援城下之師將軍
所監豈三千弊卒所能支也筑懼以洛陽來降猛陳師
而受之燕衛大將軍樂安王慕容臧率精卒十萬將解
筑圍自新樂進屯滎陽猛遣梁成鄧羌以精銳萬人卷

車赴之大破賊於滎陽留羌鎮金墉以輔國司馬桓寅
為弘農太守代羌戍陝城振旅而還堅以猛為司徒錄
尚書事進封平陽郡侯猛固辭曰今燕吳未平戎車方
駕而始得一城即受三事之賞若克殄二寇將何以加
之堅曰苟不整抑朕心何以顯卿謙光之美已詔有司
權聽所守封爵酬庸其勉從朕命遂寢司徒尚書之命
三月堅以吏部尚書權翼為尚書右僕射夏四月復以
王猛為司徒錄尚書事猛固辭乃止五月慕容令襲燕

龍城不克而死六月堅復遣王猛督鎮南將軍楊安虎
牙將軍張蚝建武將軍鄧羌等十將率步騎六萬討平
燕翼乙卯堅親送猛於灞上謂曰今授卿精兵委以重
任當先破壺關平上黨長驅取鄴此捷濟之機所謂疾
雷不及掩耳吾當親督萬衆繼卿星發舟車糧運水陸
俱進卿勿以為後慮也猛曰臣庸劣孤生操無豪介蒙
陛下恩榮內侍帷幄出總戎旅今杖威靈奉成算湯平
殘胡如風掃葉臣雖不武克不淹時願不煩鑿軫冒犯

霜露但願速勅所司部置鮮卑之所堅大悅秋七月王
猛攻壺關楊安攻晉陽八月燕太傅上庸王慕容評帥
中外精卒四十一一作三十餘萬來拒猛克壺關執燕上黨太
守南安王慕容越所過郡縣皆望風降附燕人大懼九
月楊安進圍晉陽久之未下猛留屯騎校尉苟長戍壺
關引兵助安攻晉陽因為地道遣張蚝帥壯士數百潛
入城中大呼斬關納秦兵辛巳猛安遂入晉陽執并州
刺史東海王慕容莊太傅慕容評畏猛不敢進兵屯於

潞川冬十一月辛亥猛留將軍武都毛當戍晉陽進次
潞川與評相持壬戌猛遣將軍徐成覘燕軍形要期以
日中及昏而返猛怒將斬之鄧羌固請得止猛覘知評
賣水鬻薪不撫將士人思為亂有可乘之會笑謂楊安
等曰慕容評真奴才雖億兆之衆尚不足為慮況數十
萬乎吾今茲破之必矣乃遣遊擊將軍郭慶以銳卒五
千夜從間道出評營後傍山起火燒其輜重火見鄴中
暉懼遣侍中蘭伊讓評催之速戰評大懼遣使求戰甲

子猛陳於渭源而誓衆曰王景略受國厚恩任兼內外
今與諸君深入賊地當竭力致死有進無退共立大功
以報國家受爵明公之朝稱觴父母之室不亦美乎衆
皆踴躍破釜棄糧大呼競進猛望燕兵之盛馳騎遣鄧
羌往擊之詳具羌傳羌與徐成張蚝等跨馬運矛馳赴評軍
出入數四旁若無人搴旗斬將殺傷甚衆戰及日中評
師大敗俘斬五萬餘人乘勝追擊所殺及降者又十萬
餘人評單騎奔鄴猛長驅而東丁卯進兵圍鄴猛上䟽

稱臣以甲子之日大殲醜類賴陛下仁愛之志使六州士庶不覺易主自非守迷違命一無所害堅報之曰將軍役不逾時而元惡克舉勲高前古朕今親帥六師星馳電赴將軍其休養將士以待朕至然後取之猛未至鄴鄴旁剽掠公行及至遠近帖服號令嚴明軍無私犯法簡政寬民安其業更相謂曰不啻今日復見太原王猛聞之嘆曰慕容玄恭信奇士也可謂古之遺愛矣乃設太牢以祭之十一月堅留李威輔太子宏守長安陽

平公融鎮洛陽躬帥精銳十萬向鄴七日而至安陽過
舊閭引諸耆老語及祖父之事泣然流涕乃停信宿猛
潛如安陽迎堅堅謂之曰昔周亞夫不出軍迎漢文將
軍何以臨勦而棄軍乎猛曰臣每覽亞夫之事常謂前
卻人主以此而為名將竊未多之且臣奉陛下神算擊
垂亡之虜若摧枯拉朽何足慮也監國冲幼鑒駕遠臨
脫有不虞悔之何及陛下忘臣溺上之言耶戊寅堅攻
鄴拔之慕容暉等出奔高陽遊擊將軍郭慶執而送之

辛巳堅入鄴宮諸州牧守及六夷渠帥盡來降附閱其
名籍凡得郡百五十七縣一千五百七十九戶二百四
十五萬八千六百六十九口九百九十八萬七千九百
三十五郭慶窮追餘燼慕容評奔高句麗慶追至遼海
句麗縛評送之堅散燕宮人珍寶分賜將士下詔大赦
曰朕以寡德猥承休命不能懷遠以德柔服四維至使
戎軍屢駕有害斯民雖百姓之過然亦朕之罪也其大
赦天下與之更始釋梁琛之囚除中書著作郎聞悅綰

之忠恨不及見拜其子為郎中暉稱孟高艾朗之忠於
堅堅命厚加歛葬亦拜其子為郎中以王猛為使持節
都督關東六州諸軍事車騎大將軍開府儀同三司冀
州牧鎮鄴進爵清河郡侯悉以慕容評第中之物賜之
加美妾五人上女妓十人中女妓三十人猛固辭堅曰
昔魏絳和戎猶有絲竹之賞山甫翼周實受牡_闕之錫
卿今功超二子任過管葛安得辭也其敬受之無違朕
命堅賞潞川之功賜楊安爵博平縣侯鄧羌為使持節

征虜將軍散騎常侍安定太守賜爵真定郡侯邑三千
戶郭慶為持節都督幽州諸軍事揚武將軍幽州刺史
鎮薊賜爵襄城郡侯其餘將士封賞各有差以京兆韋
鍾為魏郡太守彭豹為陽平太守其餘州縣牧守令長
皆因舊而授之以常山太守申紹為散騎侍郎使與散
騎侍郎京兆韋儒俱為繡衣使者循行關東州郡觀省
風俗勸課桑農振恤窮困收葬死亡旌顯節行燕政有
不便於民者皆變除之十二月遷慕容暉及后妃王公

百官并鮮卑四萬餘戶於長安猛表留梁琛為主簿領
記室督他日猛與僚屬語及燕朝使者猛曰人心不同
昔梁君至長安專美本朝樂君但言桓溫軍盛郝君微
說國弊參軍馮誕曰今三子皆為國臣敢問為臣之道
何先猛曰郝君知幾為先誕曰然則明公賞丁公而誅
季布也猛大笑堅自鄴如枋頭行飲至之禮歌勞止之
詩以饗群臣宴諸父老改枋頭為永昌縣復之終世甲
寅還長安封慕容暉為新興侯慕容評為給事中皇甫

真為奉車都尉李洪為駙馬都尉皆奉朝請李邺為尚

書封衡

裕之子也

為尚書郎慕容德為張掖太守燕國平獻

為宣威將軍悉羅騰為三署郎其餘封授各有差是歲

省雍州南秦州刺史仇池公楊世卒子篡自立始與秦

絕

建元七年春正月行禮于辟雍祀先師孔子太子及公

侯卿大夫士之元子皆束修釋奠焉高平蘇通長樂劉

祥並碩學者儒尤精二禮堅以通為禮記祭酒居於東

庠祥為儀禮祭酒處於西亭堅每月朔旦率百僚親臨
講論晉叛臣袁瑾朱輔固守壽春為大司馬桓溫所圍
遣使求救於堅堅以瑾為揚州刺史輔為交州刺史遣
武衛將軍王鑒前將軍張蚝率步騎二萬救之溫遣淮
南太守桓伊南頓太守桓石虔擊鑒蚝于石橋鑒蚝敗
績失馬五百匹退屯慎城丁亥堅徙關東僚傑及諸雜
夷十五萬戶於關中處烏丸雜類於馮翊北地丁零翟
斌於新安澠池徙陳留東阿萬戶以實青州諸因亂流

移避仇遠徙欲還舊業者悉聽之二月以魏郡太守章

鍾為青州刺史中壘將軍梁成為兗州刺史射聲校尉

徐成為并州刺史武衛將軍王鑒為豫州刺史左將軍

彭越為徐州刺史太尉司馬皇甫覆為荊州刺史屯騎

校尉天水姜宇為涼州刺史扶風內史王統擢之子也為益

州刺史秦州刺史西縣侯雅為使持節都督秦晉涼雍

州諸軍事秦州牧吏部尚書楊安為使持節都督益梁

州諸軍事梁州刺史復置雍州治蒲阪以長樂公丕為

使持節征東大將軍雍州刺史又以關東初平守令宜
得人令王猛以便宜簡召英俊補六守令授訖言臺除
正三月後將軍金城俱難攻晉蘭陵太守張閔子於桃
山桓溫遣兵來救不克而還楊世弟楊統驍武得衆心
起兵武都與楊纂爭分堅遣秦州牧西縣侯雅梁州刺
史楊安益州刺史王統并州刺史徐成及羽林左監朱
彤揚武將軍姚萇帥步騎七萬先取仇池進圍寧益夏
四月雅等次驚峽仇池公楊纂帥衆五萬來拒晉梁州

刺史弘農楊亮遣督護郭寶卜靖帥千餘騎助纂戰於
峽中為雅所敗死者什三四寶等亦沒纂收散兵遁走
雅遂進攻仇池楊統帥武都之衆來降纂將碩密亦來
降請為內應纂懼面縛出降雅釋其縛送之長安堅以
王統為平遠將軍南秦州刺史加楊安都督南秦州諸
軍事鎮仇池先是王猛破張天錫於枹罕獲其將燉煌
陰據及甲士五千人堅既東平六州西擒楊纂欲以德
懷遠且跨威河右遣據帥其甲士送還涼州使著作郎

梁殊閭負送之因命王猛為書諭天錫曰昔貴先公稱藩於劉石者惟審於疆弱也今論涼土之力則損於往時語大秦之德則非二趙之匹而將軍翻然自絕無乃非宗廟之福也歟夫以秦之威旁振無外可以回弱水使東流返江河使西注關東既平將移兵河右恐非六郡士民所能抗也劉表謂漢南可保將軍謂西河可全吉凶在身元龜不遠宜深算妙慮自求多福無使六世之業一旦而墜地也天錫大懼遣使謝罪稱藩堅即署

天錫使持節散騎常侍都督河右諸軍事驃騎大將軍
開府儀同三司涼州刺史西域都督護西平公夏五月
吐谷渾王辟奚葉延之子也聞楊纂降大懼遣使獻馬千匹

金銀五百斤堅大悅拜辟奚為安遠將軍涇川侯秋七
月七日堅如洛陽下書曰士死知己由來格謨故喬公
一言魏祖追慟趙司隸高平徐統往在鄴都識朕於童
稚每思其慤慤之言弗敢忘也可召其子孫詣行在所
八月以光祿勳李儼為河州刺史鎮武始九月堅還長

安歸安元侯李儼卒於上邽復以其子辯為河州刺史
冬十月堅如鄴狩於西山親馳射獸遊獵旬餘樂而忘
返伶人王洛叩馬諫曰臣聞千金之子坐不垂堂萬乘
之主行不履危故文帝馳車袁公止轡孝武好畋相如
獻規陛下為百姓父母蒼生所係何可盤於遊畋以玷
聖德今久獵不歸若禍起須臾變生不測者其如宗廟
何其如太后何堅曰善哉昔文公悟愆于虞人朕聞罪
于王洛信吾過也為之罷獵還宮王猛因進言曰畋獵

誠非急務王洛之言不可忘也因賜洛帛百疋拜官箴左右自是遂不復獵十一月堅聞桓溫廢海西公謂群臣曰溫前敗灞上後敗枋頭十五年間再傾國師六十歲公舉動如此不能思愆自貶以謝百姓方更廢君以自悅將何以自容於四海乎諺曰怒其室而作色於父母其桓溫之謂矣車騎大將軍王猛以六州任重言于堅請改授親賢及府選便宜輒已停寢別乞一州自效堅報曰朕之于卿義則君臣親踰骨肉雖復桓昭之有

管樂玄德之有孔明自謂踰之夫人主勞於求才逸於
得士既以六州相委則朕無東顧之憂非所以為優崇
乃朕自求安逸也夫取之不易守之亦難苟任非其人
患生慮表豈獨朕之憂亦卿之責也故虛位台鼎而以
分陝為先卿未照朕心殊乖素望新政俟才宜速銓補
俟東方化洽當衰衣西歸仍遣侍中梁譙詣鄴諭旨猛
乃視事如故十二月以河州刺史李辯領晉興太守還
鎮枹罕徙涼州治金城益州刺史王統攻隴西鮮卑乞

伏司繁於度堅山司繁帥衆三萬來拒至於苑川統潛襲度堅山司繁部落五萬餘皆降於統其衆聞妻子已降不戰而潰司繁無所歸亦詣統降堅以司繁為南單于留之長安以司繁從叔乞伏吐雷為勇士護軍撫其部衆是歲唐水汎溢高岸崩頽安嶮城角之下有大積木交橫如梁柱

十六國春秋卷三十六

謹案卷三十五第十頁前八行召太醫令程延使
胗之刊本胗訛珍今改

卷三十六第六頁前四行競陳猛短刊本競訛競
今改

第二十一頁後八行自新樂進屯滎陽刊本滎訛
滎今改



覆校官編修臣張秉愚

校對官編修臣裴謙

膳錄監生臣邱桂蟾